

## In viadi digital en il temp – scuvrir da nov il museum

**Cun il mediaguid pon ins scuvrir da nov il Museum retic: a maun da 18 objects da differentas epocas fan ils giasts in viadi tras l'istorgia dal Grischun dal temp da crap fin al preschent. Els sezs decidan il focus da lur gir tras il museum.**

Co vivevan ils emprims umans en noss territori? Dapi cura pon ins baiver or austras en las muntognas grischunas? Tge è in "Landquarterli" e pertge eran scumandads antruras autos en il Grischun? Il nov mediaguid accompogna las visitadras ed ils visitadras tras il museum sin in viadi d'exploraziun particular. Per lung d'exponats tschernids da l'exposiziun permanenta tira el in artg dals emprims chatschaders suenter il temp da glatsch fin als capricorns da reclama Gian e Giachen. En cumparegliaziun cun in audioguid porscha il mediaguid sper ils texts auditivs divertents en tschintg linguas ulteriuras infurmaziuns e numerus maletgs e films supplementars. Ils giasts pon selecziunar ed uschia decider sezs co ch'els vulan concepir lur excursiun tras l'istorgia dal Grischun. Tut tenor pon ins sa procurar entaifer in'ura ina survista istorica cumpacta ubain sa profundar tenor gust en ses temas preferids.

Per il guid digital pon ils giasts retrair in tablet a la recepziun dal museum ubain sa muventar tras l'exposiziun cun l'agen smartphone. Il mediaguid è numnadamain ina purschida che sa basa sin la rait ed ins al po retschaiver via internet senza problems a l'intern ed a l'extern dal museum, senza stuair telechargiar in'app sin l'agen apparat. El è damai in'amplificaziun digitala da l'exposiziun analoga, ina vetrina virtuala dal museum.

Svilups digitals dals audioguids classics èn actualmain in grond tema en il mund dals museums. Tuttina èn els il mument anc pauc derasads. Uschia han ins era fatg aposta e sin mesira il nov mediaguid dal Museum retic: l'idea ed ils cuntegns derivan dal team dal museum. Il concept tecnic, il design e la programmaziun ha l'agenzia da marcas Miux da Cuira sviluppà. Sebastian Kirsch ha manà il project. La producziun ha pudì vegnir realisada grazia al sustegn da la Fundaziun Museum retic.

Perquai che las instituziuns culturalas han stuì serrar en il rom da las mesiras per cumbatter la derasaziun da Covid-19, èn las pussaivladads digitalas d'intermediaziun daventadas anc pli impurtantas – e quai a moda marcanta. Era sch'il museum po en il fratemp puspè organisar sias activitads ed occurrenz, vegn la prescripziun da la distanza sociala ad accompagnar nus anc pli ditg. Il mediaguid porscha ils avantatgs d'ina visita guidata era per quels che sa movan il mument pli gugent individualmain en il museum empè da far part d'ina gruppa.

Mediaguid: <https://raetischesmuseum.app>

Contact: Andrea Kauer Loens, directura dal Museum retic  
tel. 081 257 48 40 / e-mail: [info@rm.gr.ch](mailto:info@rm.gr.ch)

